

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haberi

BESPLATAN PRIMJERAK • MART, 2015. broj 25.



Igralište za
"Mjedenicu"

Sadržaj

- 2-3 Posjeta igralištu i Zavodu "Mjedenica"
- 4-5 Općinsko vijeće
- 10-11 Intervju: Hidajeta Kadrić, pomoćnica načelnika za opću upravu
- 12-13 Obrazovanje i sport
- 14-15 Projekti
- 18 Predstavljamo uspješne male privrednike: Mušina tucana kahva
- 19 Staro Sarajevo



Impressum

- Izdavač:** Općina Stari Grad Sarajevo
- Tiraž:** 2.000
- Pripremili:** Almedina Porča
Alma Imamović
- DTP:** Safet Mališević
- Fotografije:** Safet Mališević
- Štampa:** "Pentagram" d.o.o.
- Adresa:** Zelenih beretki br. 4
71000 Sarajevo
- web:** www.starigrad.ba
- e-mail:** info@starigrad.ba
- Tel./fax:** +387 33 282 385
+387 33 217 916



Događaji

Hadžibajrić i Begović posjetili igralište "Mjedenica"



Bh fudbalski reprezentativac zaigrao fudbal sa štíćenicima Zavoda ● Završetak gradnje igrališta krajem aprila ● Više od 160 polaznika svakodnevno pohađa Zavod

Izgradnja sportskog igrališta Zavoda za specijalno obrazovanje i odgoj djece „Mjedenica“ bit će okončana krajem aprila. Najavljeno je ovo tokom posjete Ibrahima Hadžibajrića, načelnika Općine Stari Grad i bh. nogometnog reprezentativca Asmira Begovića Zavodu „Mjedenica“, upriličenom 23. marta. Hadžibajrić i Begović obišli su sportsko igralište, čija je izgradnja u toku. Međutim, ni to što radovi još uvijek nisu završeni nije spriječilo Asmira Begovića da sa štíćenicima Za-

voda „Mjedenica“ zaigra fudbal. Načelnik Hadžibajrić kazao je kako mu je veliko zadovoljstvo što je posjetio Zavod „Mjedenica“ i što je zajedničkim snagama jedan lijep i human projekat priveden kraju. „S Asmirom smo se vrlo brzo dogovorili o projektu. Iako smo imali imovinsko-pravnih problema uspjeli smo i to prevazići i kao što vidite projekat je u završnoj fazi“, rekao je Hadžibajrić. Begović je istakao kako se upravo zbog ovakvih projekata raduje svakom novom dolasku u Bosnu i Hercegovinu.



Begović sa štíćenicima Zavoda zaigrao fudbal



Begović, Hadžibajrić i Hodžić sa šticevicima Zavoda

“Sport je veoma važan u odrastanju svakog djeteta, a posebno zbog činjenice da razvija timski duh. Zbog toga mi je, kao sportisti, posebno drago što sam u prilici da približim sport sve većem broju djece i stvorim im uslove da se i sami počnu baviti njim“, rekao je Begović, dodavši kako je sretan što je prvi projekat Fondacije „Asmir Begović“ u BiH pred uspješnim završetkom i da ovo sigurno nije posljednji put da njegova Fondacija donosi radost bosansko-hercegovačkoj djeci.

Igralište začajno za nastavni proces

Manifestaciji u Zavodu “Mjednica”, te posjeti igralištu, prisustvovali su i predsjednik Specijalne olimpijade BiH Enver Ćosićkić, te Selmir Hadžić, direktor Zavoda “Mjednica”. Hadžić je naveo kako je ova pomoć veoma značajna za nastavni proces i razvoj fizičkih i intelektualnih sposobnosti učenika i učenica, te da se nada da će i druge javne ličnosti slijediti Begovićev primjer i pomagati razvoj lokalne zajednice.

“Oduševljeni smo što smo konačno realizovali projekat koji već dugo planiramo, a za koji nismo imali obezbjeđen novac. Veliko hvala Asmiru na nesebičnoj pomoći, ali i načelniku Hadžibajriću i Općini Stari Grad koji su u najbržem roku obezbjedili sve potrebne dozvole za izgradnju sportskog igrališta“, naglasio je Hadžić. Podsjetio je da nastavu u Zavodu “Mjednica” svakodnevno pohađa više od 160 učenika sa poteškoćama u psihofizičkom razvoju. Ćosićkić je rekao da je ova donacija samo još jedan dokaz da je Asmir Begović zaista njihov najbolji ambasador. “Ponosni smo što ga imamo uz sebe i vjerujem da ćemo baš sa ovog terena dobiti naše nove predstavnike na međunarodnim takmičenjima“, istakao je Ćosićkić. Izgradnja igrališta “Mjednica” počela je krajem oktobra prošle godine, ali zbog loših vremenskih uslova okončanje ovog projekta prolongirano je za proljeće. Finansijer kompletnog projekta je Fondacija “Asmir Begović”, a Općina Stari Grad je ustupila zemljište za izgradnju igrališta, te izdala potrebne dozvole i provela postupak izbora izvođača radova.

Igralište na skoro 190 m²

Igralište Mjednica gradi se u ulici Mjednica do broja 50, na površini od cca 186,16 m². Ranije se se na toj lokaciji nalazio parking i šiblje koje je raščišćeno, a teren pripremljen za gradnju. Igralište ima dimenzije 9x16,50 metara, sa zaštitnim prstenom od 70 cm sa svih strana i ogradom visine 5 metara. Radove izvodi firma “Sela” d.o.o.



Hodžić i Begović

Projekti

Predstavници Saudijskog fonda najavili odobravanje kredita

Saudijski fond za razvoj odobrit će Općini Stari Grad Sarajevo kreditna sredstva u iznosu od 8.062.000 dolara za realizaciju četiri razvojna projekta. Sredstva će biti odobrena već na narednoj sjednici Odbora Fonda, kazali su Mohammed Aldalilan i Sulaiman Alwotaid, predstavnici Fonda kojima su prilikom februarske posjete prezentirani projekti izgradnje podzemne garaže i multifunkcionalnog trga u ulici Avdage Šahinagića, sportske dvorane uz OŠ "Edhem Mulabdić", nadžidivanje centralnog objekta Doma zdravlja Stari Grad i poboljšanje energetske efikasnosti zgrade Općine Stari Grad.

Kreditno zaduženje na 20 godina

Nakon prezentacije, predstavnici Fonda su sa načelnikom Ibrahimom Hadžibajrićem obišli ove četiri lokacije i detaljno se upoznali sa svim projektima. "Oni su posebno zadovoljni što ćemo odobrenim sredstvima financirati projekte koji su od opšteg interesa za naše građane, odnosno što Općina



Predstavnici Općine s predstavnicima Fonda

rješava probleme građana iako bi se time trebale baviti druge, nadležne institucije. Pritom, mislim na izgradnju sportske dvorane i nadogradnju Doma zdravlja," pojasnio je Hadžibajrić i dodao da bi najkasnije za dva mjeseca mogao početi izbor izvođača radova na ovim projektima. "Rekli su nam da potpisivanje ugovora o odobravanju

sredstava očekujemo sredinom aprila mjeseca u Rijadu, a odmah nakon toga možemo krenuti sa daljnom procedurom," dodao je Hadžibajrić. Općina Stari Grad Sarajevo će se kod Saudijskog fonda za razvoj zadužiti na period od 20 godina, uz petogodišnji grejs period i interes od 2%.

Bašćaršijski trg predat izvođaču radova

Protokol o primopredaji gradilišta - Bašćaršijskog trga izvođaču radova, potpisali su 03. aprila načelnik Općine Stari Grad Ibrahim Hadžibajrić, direktor Turske uprave za međunarodni razvoj i saradnju (TIKA), Husein Šanli i direktor firme Neimari d.o.o. Ramiz Mulaomerović.

Uloga agencije TIKA je da koordinira u projektu rekonstrukcije Bašćaršijskog trga.

"Ovo nije prvi ovakav projekat koji radimo u BiH. TIKA je do sada realizovala veliki broj projekata iz oblasti restauracije kulturno-historijskih spomenika i mislimo da ćemo na

najbolji mogući način dati svoj doprinos ovom projektu," kazao je direktor Šanli.

Naglasivši da je najvažniji korak učinjen kada su sredstva od strane Općine Osman Gazi i Općine Stari Grad Sarajevo uplaćena na račun agencije TIKA, načelnik Hadžibajrić je kazao da sada početak radova zavisi od dogovora sa izvođačem.

Prema riječima Ramiza Mulaomerovića, vlasnika firme koja će izvoditi radovr, pripreme za rekonstrukciju Bašćaršijskog trga već su počele.

"Mi smo već počeli s obradom kame-

nih ploča koje su identične pločama postavljenim u Saračima i Bravadžiluku. Kamen se već priprema i reže za završni sloj, kazao je Mulaomerović dodavši da se nada dobroj saradnji sa vlasnicima i korisnicima trgovki na Bašćaršijskom trgu jer je i njima u interesu da radovi budu što bolje izvedeni. "Trenutno obavljamo razgovore sa javnim preduzećima koja su vlasnici instalacija na Trgu i dok ne otklonimo neke nedostatke u projektima i ne definišemo dogovore s njima, nećemo počinjati uklanjanje početnog sloja kako ne bismo produžili izvođenje radova," dodao je on.



Sa potpisivanja: Mulaomerović, Hadžibajrić i Šanli

Jedna od najprometnijih pješačkih zona

Bašćaršijski trg je jedna od najprometnijih pješačkih saobraćajnica u starom jezgri grada. Namijenjen je prvenstveno pješačkom saobraćaju a motorni saobraćaj je dozvoljen isključivo komunalnim vozilima, te vozilima za snabdijevanje u satima kada ima najmanje pješaka. Nepravilnog je oblika, dužine 219,59 m. Širina je promjenjiva zbog objekata koji se nalaze s obje strane, a kreće se od 10-44 m. Na centralnom dijelu Trga nalazi se Sebilj sa klupama za odmor i česmama sa vodom za piće.



Razmatrana mogućnost partnerskog pristupanja ISPA fondovima

Načelnik Hadžibajrić, sa saradnicima, posjetio Općinu Krško

Načelnik Općine Stari Grad Ibrahim Hadžibajrić, sa saradnicima, boravio je u posjeti Općini Krško, Republika Slovenija, gdje su razmatrali mogućnosti partnerskog pristupanja ISPA fondovima. U Krškom se delegacija Općine Stari Grad upoznala sa nekoliko infrastrukturnih projekata koje je ova općina uspješno realizirala zahvaljujući sredstvima odobrenim iz pomenutih fondova, te uz učešće vlade Republike Slovenije, i same Općine Krško.

Posjeta Fabriki za reciklažu otpada

Izgradnja Fabrike za reciklažu otpada koštala je oko pet miliona eura, a sredstva za izgradnju postrojenja za reciklažu u iznosu od dva miliona eura 'povučena' su iz ISPA fondova. Domaćini su bili posebno ponosni na ovaj projekat jer njihova očekivanja su da će im se uložena sredstva 'vratiti' za sedam godina, s obzirom da godišnje od reciklaže otpada imaju oko 400.000 eura prihoda. U preduzeću "Kostak", unutar kojeg djeluje pomenuta fabrika, domaćini su im bili predsjednik Miljenko Muha i direktor sektora za komunalne poslove Jože Leskovar. Pored projekata koje su uspješno realizovali, domaćini su gostima iz Starog Grada predstavili i plan projekata koje namjeravaju realizovati u budućnosti. Imajući to u vidu, razmatrale su se mogućnosti partnerskog pristupanja ISPA fondovima sa projektima iz oblasti komunalne infrastrukture i zaštite kulturno-historijske baštine, koji bi bili od interesa za obje općine.

"S obzirom da je Općina Krško do sada putem ISPA fondova uložila oko 50 miliona eura u projekte komunalne infrastrukture, njihova iskustva i upute će nam dobro doći. Razmotrili smo i mogućnost apliciranja sa projektom rekonstrukcije Bistričkog potoka koji je vrijedan oko 6,1 milion KM, a uradila bi se kompletna izmjena cijevi i rekonstrukcija brane," pojasnio je načelnik Hadžibajrić.



Posjetili i fabriku za reciklažu

Zamak Rajhenburg obnovljen EU sredstvima

U okviru dvodnevne posjete ovoj slovenačkoj Općini, Načelnika Hadžibajrića, pomoćnicu načelnika za obrazovanje, kulturu, sport i lokalni razvoj Aminu Deljković i šeficu Odsjeka za investicije Aidu Veladžić primio je i župan Općine Krško Miran Stanko sa najbližim saradnicima. Nakon razmjene iskustava o funkcionisanju ove dvije lokalne samouprave, upriličena je i posjeta zamku Rajhenburg koji je također rekonstruiran sredstvima EU, u iznosu od pet miliona KM.

U Turskoj dogovorena realizacija dva projekta



Kod načelnika Ozcana Isiklara (Silivri)

Općina Umraniye (Istanbul) sufinansirat će izgradnju sportske sale u Osnovnoj školi „Mula Mustafa Bašeskija“, a Općina Silivri (Istanbul) rekonstrukciju krova na Osnovnoj školi „Saburina“. Realizacija ovih projekata dogovorena je tokom radne posjete delegacije Općine Stari Grad turskim bratskim općinama Umraniye i Silivri. Radna posjeta, koja je upriličena od 7. do 12. marta, organizovana je s ciljem unaprjeđenja saradnje između bratskih općina u oblasti obrazovanja. Osim Ibrahima Hadžibajrića, načelnika Općine Stari Grad i Amine Deljković, pomoćnice načelnika za obrazovanje, kulturu, sport i lokalni razvoj, turske općine Umraniye i Silivri posjetili su direktori svih šest starogradskih osnovnih škola, kao i predstavnici općinskih službi nadležnih za oblasti koje su bile teme radne posjete. Delegaciju Općine Stari Grad u Općini Umraniye ugostio je njen načelnik Hasan Can, a u Općini Silivri općinski načelnik Ozcan Isiklar. Osim ovih, delegacija Općine Stari Grad bila je i u posjeti Gradu Istanbulu, gdje im je domaćin bio Muammer Yıldız, direktor istanbulske Regije za obrazovanje. Na ovom sastanku razgovarano je o uspostavljanju međusobne saradnje u oblasti obrazovanja i kulture. U sklopu radne posjete delegacija Općine Stari Grad posjetila je i mnogobrojne obrazovne institucije. Saradnja između turskih općina Silivri i Umraniye i Općine Stari Grad rezultat je potpisivanja Sporazuma o bratimljenju koji su općine Stari Grad i Silivri potpisale su u junu, 2010. godine, a općine Stari Grad i Umraniye u maju, 2013. godine.



Prijem kod načelnika Hasana Cana (Umraniye)

Općinsko vijeće


25. sjednica

Općinskog vijeća

Usvajanjem Prijedloga odluke o izmjeni Odluke o prodaji poslovnih prostora zakupcima, a potom i Prijedloga odluke o korištenju sredstava ostvarenih prodajom poslovnih prostora, Općinsko vijeće Stari Grad je na 25. sjednici omogućilo izdvajanje sredstava od 550.000 KM za sufinansiranje rekonstrukcije Bašćaršijskog trga. Ostatak sredstava za realizaciju ovog projekta obezbijedila je turska općina Osman Gazi iz Burse. S obzirom da je Odlukom o prodaji poslovnih prostora zakupcima do sada bilo moguće izdvajati samo 25% sredstava ostvarenih prodajom poslovnih prostora (na godišnjem nivou) za realizaciju investicionih projekata, upravo to je bilo potrebno izmijeniti kako bi se sredstva iz navedenog fonda mogla koristiti za rekonstrukciju Bašćaršijskog trga. Izmjenama Odluke predviđeno je da se ovaj procenat može izmijeniti, odnosno uvećati, ukoliko se radi o investicionom projektu od javnog interesa i iznimne važnosti za koji se sredstva ne mogu obezbijediti iz drugih izvora. Time su se konačno stvorili preduslovi za realizaciju svih obaveza preuzetih potpisivanjem Protokola o rekonstrukciji Bašćaršijskog trga sa TIKa-om.

Većinom glasova usvojena je i Odluka o nabavci vozila za potrebe Kliničkog centra Univerziteta u Sarajevu. Vozilo će biti kupljeno u vrijednosti do 25.000 KM, a namijenjeno je za potrebe prevoza pacijenata oboljelih od raka.

Vijećnicima je prezentiran projekat "Halvadžiluk", a arhitekta i tvorac projekta Mufid Garibija, upoznao ih je sa idejnim rješenjem izgradnje 13 novih dućana na Bašćaršiji, iznad Sebilja.



Halvadžiluk

26. sjednica

Općinskog vijeća

Formiranjem Organizacionog odbora za obilježavanje Dana Općine Stari Grad, te Komisije za dodjelu priznanja, na 26. sjednici Općinskog vijeća Stari Grad, zvanično su počele pripreme za obilježavanje 02. maja, Dana Općine. Organizacioni odbor će utvrditi program obilježavanja Dana Općine, a Komisija će odlučiti kome će tog dana biti dodijeljena priznanja: općinska povelja sa zlatnim štitom, povelja sa grbom Općine, Zlatni sebilj i policajac godine. Kako je najavio Vedran Dodik, predsjedavajući Općinskog vijeća, Dani Općine trebali bi trajati od 02. do 20. maja, 2015. godine.

Na početku sjednice, vijećnik Kluba BPS-a Alem Česir, najavio je istupanje iz ove stranke, kazavši da će ubuduće djelovati kao samostalni vijećnik, a nakon zasjedanja Mandatno-imunitetske komisije, Vijeće mu je tokom sjednice verificovalo mandat.



Vedran Dodik

Vijeće je usvojilo Prijedlog Odluke o izmjeni Odluke o davanju prethodne saglasnosti za kreditno zaduženje za realizaciju kapitalnih projekata Općine Stari Grad. Vijeće je dalo saglasnost za pokretanje procedure kreditnog zaduženja Općine Stari Grad Sarajevo kod Saudijskog fonda za razvoj u iznosu od 8.062.000,00 USD za realizaciju kapitalnih projekata: izgradnja javne podzemne garaže sa multifunkcionalnim javnim trgom, izgradnja multifunkcionalne sportske dvorane Bistrik, nadzidiivanje i opremanje centralnog objekta OJ Doma zdravlja Stari Grad i utopljanje zgrade općine Stari Grad Sarajevo.

27. sjednica

Općinskog vijeća

Za finansiranje rada boračkih udruženja sa područja Starog Grada u ovoj godini biće izdvojeno 94.000 KM iz budžeta Općine Stari Grad. Odlučeno je to na 27. sjednici Općinskog vijeća Stari Grad. Sredstva će biti raspoređena na 11 udruženja, jer je Vijeće usvojilo i zaključak da se sa predloženog spiska izostavi Udruženje "115. brigada" (6.000 KM) zbog duga za korištenje općinskih prostorija, te da se za njih naknadno nađe rješenje. Iz tog razloga, neće biti raspoređena sredstva u iznosu od 100.000 KM, koliko je bilo prvobitno planirano, nego 94.000 KM.

Na dnevni red sjednice, po hitnom postupku, uvršten je prijedlog o izdvajanju sredstava od prihoda od prodaje poslovnih prostora u iznosu od 47.000 KM za rekonstrukciju Bašćaršijskog trga. Ukupno 25.000 KM potrebno je izdvojiti za eksterni nadzor radova koji će se provoditi, te 22.000 KM za porez na dodanu vrijednost, što je Vijeće jednoglasno prihvatilo. Vijećnici su, na 27. sjednici, usvojili Izvještaj o izvršenju Budžeta Općine Stari Grad za 2014. godinu, kao i

Prijedlog Odluke o usvajanju završnog računa za 2014. godinu.

Općina Stari Grad će uputiti pismo namjere za uspostavljanje odnosa saradnje (Sporazum o saradnji) sa 4. Sektorom grada Bukurešta (Rumunija), a sa gradom Makarska (Hrvatska) bit će potpisan Sporazum o saradnji već narednog mjeseca. Pored ovih zaključaka, Vijeće je jučer dalo saglasnost Načelniku za potpisivanje pomenutih sporazuma. Također, Načelnik je

ovlašten da preduzme sve potrebne mjere u cilju realizacije projekta HUB387, koji je vijećnicima prezentovan 23. marta i čiju su oni realizaciju u formi u kojoj je predstavljen, jučerašnjim zaključkom, u potpunosti podržali.



Muhić: Predložio naknadno rješavanje "115. brigade"



Drugi eksterni nadzorni audit, proveden u Općini Stari Grad 21. i 22. januara, pokazao je da ova jedinica lokalne samouprave uspješno provodi sistem kvaliteta ISO 9001:2008, te teži njegovom unaprjeđenju i stalnim poboljšanjima u cilju pružanja što kvalitetnije usluge građanima. Na završnom sastanku dr. Halil Gutošić, ekspert certifikacijske kuće "Bureau Veritas" koja je provela audit, čestitao je uposlenicima i menadžmentu Općine, kazavši da je ova provjera pokazala da se uspješno primjenjuje sistem kvalitete. "Čestitam Općini Stari Grad na još jednom uspješnom nadzornom auditu i ono što bih ja predložio je da nastavite raditi na konstantnom osvježavanju znanja kroz odgovarajuće edukacije iz oblasti kancelarijskog poslovanja, upravnog postupka

i informatike," kazao je dr. Gutošić. Za sve službe i sektore u kojima je izvršen nadzorni audit Gutošić je imao riječi pohvale za način rada, a naglasio je kako Općina Stari Grad u nekim stvarima prednjači u odnosu na ostale jedinice lokalne samouprave, te naveo primjer uvođenja Pravilnika o postupku direktnog sporazuma koji je propisan novim Zakonom o javnim nabavkama, kao i sistem zaštite podataka Općine putem posebnog softvera koji je pohranjen na sigurnoj lokaciji. Menadžer sistema kvaliteta u Općini Stari Grad, Jasmin Taslidžić, kazao je da je naredni korak recertifikacija sistema kvaliteta. "Nastojat ćemo da recertifikacija bude po novoj reviziji standarda ISO 9001:2015 koja bi trebala biti usvojena sredinom ove godine," kazao je Taslidžić.

Općina Stari Grad u Uniji turskih općina

Općina Stari Grad Sarajevo je na sjednici Izvršnog odbora Unije turskih općina u svijetu, održanoj 28. januara, 2015. godine, primljena u članstvo ove međunarodne organizacije. Općini Stari Grad se, u ime Unije turskih općina u svijetu, obratio predsjedavajući Unije Merkez Efendi Mah, s pozivom za pristupanje. Kolegij Općinskog vijeća je zauzeo pozitivan stav po ovom pitanju, dok je Općinsko vijeće na sjednici održanoj u januaru dalo saglasnost za pristupanje. Unija turskih općina u svijetu je međunarodna organizacija koja svojom aktivnošću doprinosi uspostavljanju odnosa saradnje sa zemljama i regijama s turskim govornim područjem, kao i lokalnim upravama iz mjesta koja imaju geografske, historijske i kulturne sličnosti s turskim općinama,



obezbjeđujući pritom podršku njihovom razvoju i očuvanju historijskog naslijeđa. U sastavu ove Unije je 1.090 općina iz zemalja kao što su Bugarska, Albanija, Crna Gora, Srbija, Ukrajina... Članstvo u Uniji turskih općina u svijetu omogućit će Općini Stari Grad lakši pristup investitorima, uspostavljanje kulturne i drugih oblika saradnje. Općina Stari Grad je oslobođena plaćanja članarine u Uniji, koja je prilično visoka, jer upravo iz sredstava koja se prikupljaju članarinama, omogućuje se realizacija različitih projekata.

Izveštaj o realizaciji Strategije lokalnog razvoja

Strategiju lokalnog razvoja Općine Stari Grad Sarajevo 2014/2018. godine Općinsko vijeće Stari Grad usvojilo je na sjednici u aprilu, 2014. godine, nakon čega je počela njena implementacija. Strategija obuhvata četiri strateška prioriteta i 14 strateških ciljeva. Ukupan budžet planiran za realizaciju ovog općinskog dokumenta je 22.075.000 eura.

Prvi strateški prioritet odnosi se na Poboljšanje i unaprjeđenje uslova življenja i standarda građana. Budžet predviđen za realizaciju ovog pravca je 20.890.000 eura. Od maja do decembra, 2014. godine, u sklopu prvog strateškog prioriteta, realizovano je niz aktivnosti iz svih pet navedenih oblasti za što je utrošeno 3.475.902,72 eura, iz čega proizilazi da je realizovano 16,64 odsto planiranih mjera.



Info press centar: Jačanje komunikacije s građanima

Drugi strateški prioritet odnosi se na Poboljšanje i diverzifikaciju privrede i privlačenje novih biznisa i investicija. Budžet predviđen za realizaciju ovog pravca je 355.000 eura. Za implementirane aktivnosti od maja do decembra prošle godine utrošeno je 77.297,62 eura, iz čega proizilazi da je realizovano 21,77 odsto planiranih mjera.

Treći strateški prioritet odnosi se na Povećanje zaposlenosti, a budžet predviđen za realizaciju ovih aktivnosti u periodu od pet godina je 585.000 eura. Za implementaciju aktivnosti u sklopu ova tri strateška cilja, za period od osam mjeseci prošle godine utrošeno je 65.647,80 eura, iz čega proizilazi da je realizovano 11,22 odsto planiranih mjera.

I četvrti strateški prioritet odnosi se na Jačanje komunikacije s građanima, osnaživanje međuopćinske i regionalne saradnje, međunarodne programe i donatore. Budžet predviđen za realizaciju ovih aktivnosti je 245.000 eura, a za implementaciju je od maja do decembra prošle godine utrošeno je 20.841,77 eura, iz čega proizilazi da je realizovano 8,50 odsto planiranih mjera. Na osnovu planiranog i realizovanog budžeta vidljivo je da je Strategija, u finansijskom dijelu, za osam mjeseci realizovana u iznosu od 16,49 odsto.

Delegacija iz Seldžuka posjetila Stari Grad



Hadžibajrić i Altay sa saradnicima

Delegacija najstarije turske općine u Konyi, Općine Seldžuk na čelu s načelnikom Ugurom Ibrahimom Altayem posjetila je 21. januara Općinu Stari Grad Sarajevo. Osmočlanu delegaciju Općine Seldžuk dočekaio je Ibrahim Hadžibajrić, načelnik Općine Stari Grad. S obzirom da je Općina Stari Grad sa Općinom Seldžuk potpisala Sporazum o bratimljenju u augustu, 2011. godine, tokom posjete bilo je govora o daljoj saradnji i o budućim zajedničkim projektima.

Da ova saradnja nije ostala samo slovo na papiru dokazuje i izgradnja Balkansko-mevlevijskog istraživačkog centra u aprilu, 2013. godine na površini od 400 metara kvadratnih u naselju Kovači. Njegovu gradnju je sa oko 1,2 miliona KM finansirala Općina Seldžuk. Zahvalivši se na gostoprimstvu Altay je kazao da najbolju saradnju od svih pobratimskih općina ima sa Općinom Stari Grad. "Ponosan sam što smo za kratko vrijeme realizovali veoma značajne projekte i sretan sam što i dalje možemo davati doprinos u razvoju Starog Grada", istakao je Altay.

Podrška projektu "Inkluzija kroz sport"

Ugovor o dodjeli granta u iznosu od 3.000 KM za realizaciju projekta "Inkluzija kroz sport", potpisali su 24. marta načelnik Općine Stari Grad Ibrahim Hadžibajrić i predsjednik Sportskog društva slijepih i slabovidnih Kantona Sarajevo, Kenan Kudus. Prema riječima Kudusa projekat "Inkluzija kroz sport" predviđa seriju predavanja za sve učenike četvrtih razreda sa područja Starog Grada o podizanju svijesti o problemu "Bijelog štapa". "Jedan od primarnih ciljeva ovog projekta je da se kroz direktnu interakciju sa učenicima razbijaju predrasude o osobama sa invaliditetom, da se podigne svijest i odgovornost u odnosu na ukupne probleme „bijelog štapa“. Cilj je da se mladi ljudi ohrabre kada se nađu u situaciji da mogu pružiti pomoć slijepoj osobi, paraplegičaru i sl.", priča Kudus.

Projekti

Općina izdvojila 200.000 KM za djecu boračke populacije



oko 200.000 KM izdvojeno je budžetom Općine Stari Grad ove godine za stipendije djeci šehida, poginulih boraca, RVI i demobilisanih boraca za školsku 2014/2015. godinu. Konkurs za stipendiranje učenika i studenata za školsku 2014/2015. godinu, raspisala je Služba za boračko-invalidsku zaštitu Općine Stari Grad, a prijavio se 261 kandidat. Nakon provedene procedure, dodijeljeno je 207 stipendija: 94 za srednjoškolce i 113 za studente. Prilikom potpisivanja ugovora o dodjeli stipendija, stipendistima se obratio pomoćnik načelnika za boračko-invalidsku zaštitu Sakib Avdibegović. "Ponosni smo što smo uspjeli osigurati sredstva za stipendiranje djece boračke populacije, a posebno na činjenicu da su sva djeca iz šehidskih porodica, RVI i demobilisanih boraca, koja su ispunjavala uslove konkursa, dobili stipendije," kazao je Avdibegović. On je naglasio da Općina Stari Grad ima najskromniji budžet u odnosu na ostale gradske općine, ali uspijeva već dvije godine izdvajati najviše sredstava za stipendiranje djece boračke populacije.

Emina Morinjaković, studentica druge godine Prirodno-matematičkog fakulteta, prvi put je od Općine Stari Grad dobila stipendiju i kaže da će joj dodatni novac dobro doći. "Zahvaljujući načelniku Hadžibajriću

i Općini imat ću dodatni izvor primanja koji će mi olakšati studij", kazala je Emina.

Naida Džombić, studentica je Pravnog fakulteta u Sarajevu, druga godina. Kako kaže, stipendija joj puno znači. "Ona će mi koristiti prvenstveno kao dodatni džeparac, kako za knjige i skripte, tako i za sitnice koje su nepohodne jednoj djevojci", izjavila je Naida.



Naida Džombić, studentica Pravnog fakulteta

Priznanja



Ibrahim Hadžibajrić lokalni lider godine

Ibrahim Hadžibajrić, načelnik Općine Stari Grad Sarajevo, izabran je za lokalnog lidera godine u izboru bh. izdanja Večernjeg lista. Manifestacija pod nazivom "Večernjakov pečat" održana je sinoć u Hrvatskom domu Hercega Stjepana Kosače u Mostaru po 14. put. "Večernjakov pečat" mnogi smatraju najsprestiznijim društvenim događajem u zemlji, a brojne ugledne zvanice koje su sinoć prisustvovala ovom događaju idu u prilog ovoj tvrdnji.

Hadžibajrić se tako sinoć na sceni našao rame uz rame sa hrvatskom predsjednicom Kolindom Grabar-Kitarović, a snimljenom video porukom obratio se i bivši predsjednik SAD-a Bill Clinton koji je proglašen osobom godine u svijetu, kao i osobe godine u regiji Novak Đoković i Marin Čilić.

Osobom godine, u izboru bh izdanja Večernjeg lista, proglašen je Husein Smajić iz Bugojna u čijem su dvorištu pronađeni ostaci srednjovjekovne katoličke crkve i koji je ponudio da se ta

crkva ponovno izgradi na istom mjestu.

Nagrade bh. izdanja Večernjeg lista održane su pod pokroviteljstvom Predsjedništva BiH.

Priznanja „Večernjakov pečat“ u različitim kategorijama sinoć su još dobili: italijanski pjevač Toto Cutugno (Pečat za Europu), visoka predstavnica Evropske unije za vanjske poslove i sigurnosnu politiku Federica Mogherini (Evropski lider), Martina Čuljak (Ponos BiH – Heroji poplava), Andrej Benić (Ponos BiH – Humanista godine), Irmela Peranović (Ponos BiH – Uspjeh godine), Čamil Duraković i Biljana Rakić (Međupolitički dijalog), Monika Tomić (Znanost), Kemal Monteno (Kultura), Enisa Bekto (Gospodarstvenik godine), Igor i Ivan Karačić (Sportaš godine), mostarski paroh Radivoje Krulj (Međureligijski dijalog) i Milijan Brkić (Naše gore list).

Podsjećamo, Ibrahim Hadžibajrić proglašen je 2010. godine Najnačelnikom u BiH, a 2012. godine dodijeljena mu je plaketa za Evropskog načelnika Federacije BiH.



Hrvatska predsjednica Grabar - Kitarović na sceni sa dobitnicima

Nagrade policajcima za hapšenje napadača na Taubera



Načelnik sa nagrađenim policajcima

Nedim Aličković, Adil Poturković, Nedim Vrabac i Sanel Trnka, pripadnici Policijske stanice Stari Grad, koji su učestvovali u hapšenju napadača na Elija Taubera, savjetnika za kulturu i vjeru Jevrejske zajednice BiH, dobili su zahvalnice i novčane nagrade načelnika Općine Stari Grad, Ibrahima Hadžibajrića. Policajci su nagrađeni za brzo i efikasno djelovanje u otkrivanju i hapšenju počinioca ovog krivičnog djela. Istakavši da su časno i profesionalno obavljali svoj posao, policajci su se zahvalili načelniku na ukazanoj podršci, te se osvrnuli na nedavni napad na Taubera koji se desio u subotu (21. marta) u ugostiteljskom objektu "Wiener Cafe" koji se nalazi u ulici Veliki Čurčiluk na broju 3, kada ga je napadač (F.A.) udario utegom nanijevši mu povrede glave.

Za podršku koju Općina Stari Grad pruža Prvoj policijskoj upravi zahvalio se načelnik Prve policijske uprave Fahrudin Halač, u ime komesara Čosića. "Zahvaljujemo se što su općinska vlast i načelnik Hadžibajrić prepoznali rad policijskih organa i napore u rasvjetljavanju ovog krivičnog djela, kao i za sveukupnu podršku i pomoć u radu koju pružaju Prvoj policijskoj upravi," kazao je Halač.

Kako je MUP KS ranije objavio, Elija Taubera savjetnika za kulturu i vjeru Jevrejske zajednice u BiH napao je F.A. Rođen 1967. godine iz Sarajeva, koji je lišen slobode.

Intervju: Hidajeta Kadrić, pomoćnica načelnika za opću upravu

Zadovoljstvo je na licima građana vidjeti osmijeh zbog pružene usluge

Općina kao jedinica lokalne samouprave je servis za građane • U šalter sali postavljen "red sistem" • Pojedini propisi doneseni prije 25-30 godina

Hidajeta Kadrić, uposlenica je Općine Stari Grad preko 20 godina. Bila je šef Odsjeka za personalne poslove, a nakon toga i šef Odsjeka za boračka pitanja. Od oktobra 2009. godine je pomoćnica načelnika Službe za opću upravu. Ruководi najbrojnijom Službom koja svakodnevno prima brojne zahtjeve građana, te uposlenici šalter sale rade u dvije smjene. U radu Službe susreće se sa brojnim problemima, naročito zbog neusklađenosti propisa. Pojedini su doneseni prije 25-30 godina i nisu prilagođeni današnjem vremenu, dok novi propisi nemaju adekvatna uputstva za primjenu.

Biografija

Hidajeta Kadrić, rođena je 1953. godine u Kreševu gdje je završila i osmogodišnje školovanje. Gimnaziju je završila u Kiseljaku, a Pravni fakultet u Sarajevu.

Prvo radno iskustvo počela je sticati 1978. godine u jednom OOUR-u Tkaonice čilima Sarajevo. Od 1994. godine zaposlena je u Općini Stari Grad Sarajevo, gdje je radila na više radnih zadataka. U oktobru 2009. godine postavljena je na mjesto pomoćnika načelnika za opću upravu. Početkom 2015. godine imenovana je za člana Komisije za polaganje posebnog stručnog ispita za matičare na nivou FBiH.

□ *Koje su obaveze rukovodioca Službe koja prima najveći broj stranaka?*

Poslovi i zadaci u općoj upravi su dosta široki, pa su samim tim i moji zadaci kao rukovodioca raznovrsni. Prvenstveno, moja obaveza je obezbijediti zakonitost i efikasnost u radu ove Službe. Opći poslovi obuhvataju rad pisarnice tj. prijem zahtjeva i podnesaka, poslove pružanja upravne pomoći, pristupa informacijama, ovjera prepisa i potpisa, građanska stanja naših



Hidajeta Kadrić, pomoćnica načelnika za opću upravu

sugrađana kao što su: izdavanje izvoda iz Matične knjige (MK), upisi u MKR, upis konstatacije državljanstva u MKR, ispravke i dopune podataka u MK, vjenčanja i sl. Pored ovih poslova, u Službi je trenutno veliki broj zahtjeva koji se odnose upravo na sređivanje podataka u matičnim knjigama, koje se vode kod Općine Stari Grad.

□ *Rad sa strankama i brojni zahtjevi, te izmjene zakonskih akata, nalažu i promjene na terenu, odnosno novine u poslu?*

Uveli smo određene novine u radu Službe. Svakodnevno sam u kontaktu sa svojim saradnicima, kako sa šefovima odsjeka tako i sa uposlenicima. Mnogo je situacija u kojima dajem uputstva i neophodnu stručnu pomoć.

U šalter sali je postavljen "red sistem" i to je znatno olakšalo rad uposlenika, a i građani su zadovoljniji. Gužve koje su svakodnevne prevazilaze se na mnogo lakši način. Poboļjšani su uslovi rada u matičnom uredu gdje je obezbijedena kancelarija za nesmetan rad matičara prilikom upisa u matične knjige. Uposlenici pružaju usluge i upravne pomoći starijim sugrađanima, kako kroz popunjavanje obrazaca, tako do upute gdje mogu ostvariti svoje pra-

vo. Pristup informacijama je također referat gdje ima dosta zahtjeva građana za određenim informacijama.

□ *Ova Služba je jedna od najvećih. Koliko ljudi broji Vaš tim i da li ste zadovoljni sa svojim saradnicima?*

Služba je zaista mnogobrojna i broji 27 uposlenika, od kojih je 6 državnih službenika i 21 namještenik. Jako sam zadovoljna sa svojim timom. To su uposlenici sa dugogodišnjim iskustvom i vrlo su savjesni u obavljanju svojih zadataka. Uposlenici u šalter sali rade u dvije smjene i radno vrijeme im je od 7,30 do 18,00 sati.

□ *Sigurno se susrećete i sa poteškoćama u radu?*

Posao je jako zahtjevan i normalno je da svakodnevno nailazimo na poteškoće u radu. Veliki broj naših sugrađana nailazi na nemogućnost trenutnog rješavanja svog zahtjeva i onda se to reflektuje kao problem. U radu se susrećem sa propisima koji su doneseni prije 25 do 30 godina i koji nisu prilagođeni današnjem vremenu i uređenju ili sa novim propisima koji nemaju adekvatna uputstva za primjenu zakona. Ne vjerujem da postoji osoba koja se ne susreće sa nizom problema

i poteškoća u svom radu. Iskustvo me naučilo da se svaka prepreka može savladati uz dobru volju, mnogo mudrosti, rada i strpljenja. Nastojimo ispuniti sve zahtjeve građana. Posebno zadovoljstvo mi je kad na licima građana, a i svojih uposlenika vidim osmijeh nakon pružene usluge.

Velike promjene u radu Matičnog ureda

□ *Prošla godina je bila puna izazova za sve vas. Šalter sala je ovjerila preko pola miliona dokumenata, došlo je do uvezivanja matičnih knjiga u Centralni matični ured. Kako ste se uspjeli uklopiti u sve te novine?*

Protékla godina je bila jako naporna za uposlenike Službe za opću upravu. Stradanjem Općine Centar, najveći teret je prešao na Općinu Stari Grad. Istina je da su moji saradnici ovjerali preko 550.000 kopija različitih dokumenata. Legalizovali su 55.000 potpisa u šalter sali i na terenu odlazeći na kućne adrese naših bolesnih i invalidnih sugrađana.

Matični ured je doživio velike promjene u svom radu i u svojim nadležnostima. Nekada je pojam matičara bio vezan za pojam vjenčanja ili izdavanje izvoda iz matičnih knjiga, a danas je rad u matičnom uredu jako složen i obiman. Zahtjevi građana za izdavanje ličnih dokumenata (lična karta i pasoš), također prolaze provjeru upisa u MKR i KD kroz matični ured. U junu, 2014.

Maksimalna ekspeditivnost Službe

Poslovi koje sam obavljala u drugim službama su bili nešto drugačiji i bili su iz jedne oblasti. Moji današnji radni zadaci su mnogo složeniji, raznovrsniji i odgovorniji i zahtijevaju dosta radnog angažmana. Općina kao jedinica lokalne samouprave je servis za građane, a poslovi opće uprave su direktno u službi građana. To znači da uvijek nastojimo udovoljiti zahtjevima stranaka, naravno ukoliko su ispunjeni zakonski uslovi. Svi poslovi su uglavnom hitni i mora postojati maksimalna ekspeditivnost u radu ove Službe.



Sa uposlenicima i rukovodiocem Pisarnice

godine došlo je do uvezivanja matičnih ureda u Centralni matični registar i to je donijelo velike olakšice za građane i za sve matične urede FBiH. Sada građani mogu uzeti izvode iz matične knjige u bilo kojoj Općini za područje Federacije BiH.

□ *Šta je donio novi Zakon o matičnim knjigama?*

Novim Zakonom o matičnim knjigama omogućeno je vršiti određene izmjene i dopune podataka u matičnim knjigama. S obzirom da se kod nas nalaze prepisi iz vjerskih knjiga, tu je bilo dosta ispravki ili dopuna podataka u matičnim knjigama rođenih naročito za godišta od 1929. do 1945. godine.

Pored toga, po novim izmjenama, novorođena djeca se upisuju prema mjestu prebivališta majke, a smrt lica se upisuje prema mjestu prebivališta umrlog.

Ranije su se novorođena djeca upisivala u Općini Centar kao i svi koji su umrli u bolnici, tako da se sada obim poslova u matičnom uredu znatno uvećao i kroz te izmjene propisa. Matičari su položili i poseban stručni ispit za matičare.

□ *Izabrani ste za člana Komisije za polaganje stručnog ispita za matičare na nivou FBiH i jedina ste predstavница lokalnih zajednica u ovom tijelu. Možete li nam reći nešto više o tome?*

Federalno ministarstvo unutrašnjih poslova je formiralo Komisiju za polaganje posebnog stručnog ispita za matičare na nivou Federacije. Imenovana sam za člana te Komisiju kao predstavnicu lokalne zajednice. To je za mene jedno izuzetno priznanje, kao nagrada za moj uloženi trud na implementaciji novog Zakona i za učešće u radu svih seminara i edukacija.



Sa uposlenicima Šalter sale i Matičnog ureda

Hadžibajrić ugostio najuspješnije sportiste u 2014. godini



Sa najsportistima u BiH

Višestruku prvakinja u džudu i najbolju sportašicu BiH u 2014. godini, Larisu Cerić, te najuspješnijeg sportistu za seniore BiH u 2014. godini, Haruna Sadikovića i trenera i selektora bh. džudo reprezentacije, Branu Crnogorca primio je 19. januara načelnik Ibrahim Hadžibajrić. Povod za posjetu bili su izuzetni rezultati koji su postigli ovi mladi bosanskohercegovački sportisti. Larisa je 2014. godinu završila na prvom mjestu rang liste Evropske džudo unije (EJU). U prošloj godini ostvarila je niz značajnih rezultata u seniorskoj konkurenciji, a posebno se ističe srebrna medalja osvojena na Evropskom seniorskom prvenstvu u francuskom Montpellieru.

Kako je kazala, puno joj znači pomoć i podrška Općine Stari Grad Sarajevo. "Zaista ste nam od velike pomoći. I nadam se da ćemo i u ovoj godini ostvariti zapažene rezultate i na taj način Vam se bar malo odužiti", istakla je Larisa.

Sadiković i Lajkert najbolji seniori

Kod muškaraca titulu najuspješnijeg sportiste 2014. godine za seniore dijele džudista Harun Sadiković i skijaš Igor Lajkert. Na Evropskom prvenstvu za seniore do 23 godine održanom u Poljskoj, Harun je u kategoriji plus 100 osvojio srebrnu medalju. "Zahvaljujem se što ste nas ugostili i nadam se da ćemo ostati najuspješniji sportisti i da ćemo imati priliku ponovo doći", kazao je Sadiković. Hadžibajrić je čestitao Larisi i Harunu na postignutim rezultatima, te naglasio kako će Općina Stari Grad kao i do sada, u skladu s mogućnostima, nastaviti pomagati rad ovih sportista.

Obrazovanje i sport

Stipendije nadarenim učenicima i studentima



Najuspješnije studentice: Hana Šehagić i Lemana Omerbegović

Općina Stari Grad je, putem Službe za obrazovanje, kulturu, sport i lokalni razvoj, ove godine provela proceduru i podijelila više od 59.000 KM stipendija nadarenim učenicima i studentima. Stipendije su dodijeljene za školsku 2014./2015. godinu, u iznosu od 120,00 KM za studente i 80,00 KM za učenike srednjih škola.

Prilikom potpisivanja ugovora sa korisnicima stipendija, načelnik Hadžibajrić je pojasnio da je ovo četvrta generacija nadarenih učenika i studenata koji su dobili stipendije od Općine. "Dodijelili smo stipendije za 27 srednjoškolaca i 37 studenata, a budžetom smo za te svrhe planirali oko 60.000 KM", kazao je Hadžibajrić. Kako je pojasnila pomoćnica načelnika za obrazovanje, kulturu, sport i lokalni razvoj Amina Deljković, glavni kriterij

za odabir stipendista bila je prolazna ocjena u prethodnoj školskoj godini: za srednjoškolce najmanje 4,8, a za studente najmanje 8,5. "Vi ste ste naši najdraži gosti jer ste najpametniji, najvrijedniji i najodgovorniji i zaista smo ponosni na sve vas", istakla je Deljković. Iako su svi odabrani stipendisti ispunili visoke kriterije predviđene Javnim konkursom, ipak su među njima najbolje bile studentice Hana Šehagić i Lemana Omerbegović sa prosjekom ocjena 10. Obje su se zahvalile Općini na ukazanom povjerenju i kazale da im je velika čast što su dobile stipendije.

Ugovor o stipendiranju potpisala je i Amina Kadrić, studentica Medicinskog fakulteta u Sarajevu. "Velika mi je čast dobiti stipendiju, pogotovo ovog karaktera. To me podstiče da i dalje napredujem u obrazovanju", kazala je Amina.

Besplatan prevoz i užine za učenike

Prevoz učenika na relaciji Obhodža – Osnovna škola "Vrhbosna" besplatan je i ove godine. Općina Stari Grad provela je proceduru i potpisala ugovor sa prevoznikom Centrotans Eurolines d.d, a sredstva koja Općina iskoristi za ove svrhe, naknadno će refundirati Ministarstvo za obrazovanje, nauku i mlade Kantona Sarajevo. Učenici OŠ "Vrhbosna" koji žive u naselju Obhodža imaju obezbjeđen prevoz svakog radnog dana (kada se odvija redovna nastava prema programu škole) u vremenu od 07,30 do 17,00 sati.

Za đacke užine 30.000 KM

Općina je, putem Službe za obrazovanje, kulturu, sport i lokalni razvoj, i u ovoj godini planirala sredstva za finansiranje užina djeci iz porodica slabijeg imovinskog stanja koja pohađaju starogradske osnovne škole. Budžetom je planirano oko 30.000 KM za 158 učenika iz šest osnovnih škola koji ostvaruju pravo na besplatnu užinu tokom školske godine. Pored toga, planirana je participacija i za pet učenika Centra "Vladimir Nazor", koji također ostvaruju pravo na besplatnu užinu.

Obrazovanje i sport

OŠ "Vrhbosna" bi mogla biti izgrađena do kraja godine

Općina Stari Grad je izdvojila 35.000 KM za nastavak radova na izgradnji školske zgrade OŠ "Vrhbosna", dijela koji je potpuno porušen u ratu i čija je izgradnja počela prije četiri godine. Ovim sredstvima bit će finansirani radovi na postavljanju fasade, a ukoliko bi nadležno ministarstvo Kantona Sarajevo obezbijedilo preostala sredstva, objekat bi mogao biti završen krajem ove ili početkom sljedeće godine. Gradnja objekta Lamela II OŠ "Vrhbosna" počela je prije četiri godine i Općina Stari Grad do sada je obezbijedila oko 50% sredstava potrebnih za gradnju. Procijenjena vrijednost projekta je oko 400.000 KM. Sporazum o međusobnim pravima i obavezama potpisali su sedinom januara načelnik Ibrahim Hadžibajrić i direktor OŠ "Vrhbosna" Mirsad Lelo. "Uključili smo se u ovaj projekat prije četiri godine i počeli od temelja. Prošle godine objekat je stavljen pod krov, postavljena je vanjska stolarija i urađeno



Sporazum potpisali Lelo i Hadžibajrić

unutarnje malterisanje. Preostali su finalni radovi, a Općina će sa 35.000 KM finansirati postavljanje fasade," kazao je načelnik Ibrahim Hadžibajrić. Direktor škole izrazio je zahvalnost Općini i načelniku Hadžibajriću za podršku koju su pružali prethodne četiri godine i istakao da će izdvojenim sredstvima biti završeni fasadni radovi, dok će zanatski biti nastavljene prispjećem preostalim sredstvima i eventualnim uključivanjem nadležnog ministarstva.

Saniran kvar na kotlovnici u OŠ "Saburina"

Nakon reakcije Općine Stari Grad i izdvajanja sredstava u iznosu od 15.000 KM saniran je kvar na siste-



Općina izdvojila 15.000 KM

mu grijanja u OŠ "Saburina", te su učenici ove najstarije škole u Starom Gradu nastavili drugo polugodište u toplim učionicama. Novi plamenik na kotlu kojim se zagrijava objekat postavljen je početkom februara, čime je ovaj problem riješen. Prema riječima Rešada Foče, v.d. direktora škole, situacija je postala izuzetno teška. "Ovo je za nas bio krucijalni problem. Pitanje je da li bismo mogli nastaviti drugo polugodište u normalnim uslovima, da Općina Stari Grad nije izdvojila sredstva da nam pomogne," kazao je Fočo. Podsjetivši da je Općina Stari Grad na isti način reagovala i prije nekoliko mjeseci kada je zakazao kotao kojim se zagrijava OŠ "Mula Mustafa Bašeskija", načelnik Hadžibajrić je kazao da je tada izdvojeno oko 20.000 KM za sufinansiranje radova. OŠ "Saburina" trenutno pohađa 295 učenika raspoređenih u 14 odjeljenja.

Otvorena rekonstruisana sala u školi na Hridu



Sa otvaranja obnovljene sale

Presijecanjem vrpce i prigodnim programom u kojem su učestvovali učenici sekcija OŠ "Šejh Muhamed ef. Hadžijamaković", 25. februara je svečano otvorena rekonstruisana fiskulturna sala u ovoj starogradskoj školi. Škola koja se nalazi na Hridu, često je suočena sa problemom podzemnih voda, a sve je kulminiralo prošle godine kada su našu zemlju zahvatile obilne kiše. Usljed velikih padavina došlo je do podizanja parketa u fiskulturnoj sali, te je rad u njoj bio potpuno onemogućen, a učenici uskraćeni za redovno obavljanje nastave tjelesnog odgoja.



Nastup folklorne sekcije

Uprava škole je zatražila pomoć resornog ministarstva i Općine Stari Grad. "Baš u to vrijeme naša škola je primala vrijednu donaciju u računarskoj opremi od Turske vojne misije u BiH, te je načelnik Ibrahim Hadžibajrić koji je priustvovao toj ceremoniji, predložio da iznađu način i finansiraju rekonstrukciju i sanaciju sale. Vrlo brzo dobili smo pozitivan odgovor i 08. januara su počeli radovi", kazao je direktor škole Kerim Fejzagić. On je dodao da je u obnovu fiskulturne sale uloženo oko 40.000 KM, a sve troškove snosila je Turska vojna misija u BiH. u BiH, n.j.e. Cihad Erginay, koji je ovu školu posjetio po drugi put. Istakavši da je prilikom njegove prve posjete sala bila u jako lošem stanju, ambasador Erginay se zahvalio Turskoj vojnoj misiji što su u tako kratkom periodu uspjeli osigurati njenu rekonstrukciju.

Projekat stambenog zbrinjavanja Roma



Nevzeta Mulalić, menadžer projekta

Općina Stari Grad uključila se u projekat za rješavanje problema Roma o oblasti stambenog zbrinjavanja, te od Ministarstva za ljudska prava i izbjeglice BiH za te svrhe dobila 84.000 KM.

Sredstvima bi trebao biti obezbijeden smještaj za četiri romske porodice sa područja Starog Grada koje broje 11 članova. Nakon odobravanja sredstava, Općina je sa Ministarstvom potpisala Memorandum o razumijevanju kojim se definiše kao implementator projekta stambenog zbrinjavanja Roma u 2014. godini. Po formiranju radnog tima za realizaciju, te menadžera projekta, počele su prve aktivnosti na realizaciji.

“Radni tim čine uposlenici Općine iz nekoliko službi koji su definisali aktivnosti koje je potrebno poduzeti. Kolege iz Odsjeka za investicije imaju zadatak da pripreme projektnu dokumentaciju, izvrše reviziju, odabir projektanta i nadzor.” kazala je Nevzeta Mulalić, menadžer projekta i šef Odsjeka za stambene poslove. “Ovo će biti prvi put da radimo kompletan projekat sami od izrade projektne dokumentacije, pa sve do realizacije, odnosno do stambenog zbrinjavanja ovih porodica, tako da je veliki posao pred nama,” kazala je Mulalić.

Sanacija dijela ulice Mahmutovac



Sadašnje stanje ulice

U aprilu će početi sanacija dijela ulice Mahmutovac od broja 10 do 44. Ulica će biti sanirana u dužini od 83 metra, s obzirom da je postojeća kaldrma u lošem stanju. Rekonstrukcija će podrazumijevati skidanje starog asfalta i tampona, postavljanje novog tampona, izdizanje šahtova i šibera, te asfaltiranje ulice.

Izvođač radova bit će Kantonalno javno komunalno preduzeće „Rad“, a projekat će sa oko 32.200 KM finansirati Općina Stari Grad Sarajevo.

Projekti



Preventivno čišćenje i uređenje Ramića potoka

Općina Stari Grad je, putem Službe za Civilnu zaštitu, pokrenula akciju raščišćavanja Ramića potoka od velikih količina otpada i šiblja (lokalitet Ramića banja-potok, dionica od auto servisa “Nose” do ulaza u kanalisani dio potoka). Akcija je provedena kako bi se djelovalo preventivno i spriječila začepjenja i eventualna izljevanja vode usljed većih padavina.

Kako su saopćili iz Službe za civilnu zaštitu, uređenje Ramića banja - potoka bilo je neophodno zbog nagomilanog otpada, šiblja i mulja što je prijetilo da izazove začepjenje i izljevanje potoka u slučaju obilnijih padavina. Angažovano je Dobrovoljno vatrogasno društvo “Vratnik” koji su radili na raščišćavanju potoka, etapno i u skladu sa vremenskim uslovima. Radovi su obustavljeni s dolaskom zimskih dana i snježnih padavina.

“Radovi se izvode u fazama, a podrazumijevaju kresanje šiblja i granja u samom koritu i na obalama potoka, čišćenje kas-kada korita, smeća i drugog otpada sa obalnog dijela i odvoz smeća i ostalog otpada”, pojašnjavaju u Službi. Dodali su i da je samo sa jednog dijela potoka izvučeno četiri kamiona otpada, a finalni radovi su planirani čim se poboljšaju vremenski uslovi.

Iz Službe za civilnu zaštitu apeluju na građane da na zabranjenim mjestima kao što je Ramića banja - potok ne odlažu otpad, jer time stvaraju višestruke probleme. “Zbog nagomilanog otpada teži je protok vode, što može izazvati začepjenje i izljevanje potoka u zimskom periodu, ali i dovesti do pojave raznih zaraznih bolesti”, ističu u Službi.

Za akciju čišćenja Ramića potoka, Općina Stari Grad je, putem Službe za civilnu zaštitu, izdvojila je 4.000 KM.

Nove rešetke za vodu

Postavljene su nove sabirne rešetke za vodu u ulici Hamdije Kreševljakovića broj 55 (preko puta zgrade Papagajka) i kod rezervoara Moščanica. Na prvoj lokaciji urađena je demontaža male postojeće rešetke, čišćenje sabirnog kanala, te ugradnja betonske poprečne sabirne rešetke dužine oko dva metra. Na drugoj lokaciji postavljena je nova rešetka, te položeno 50 metara plastičnih cijevi radi odvodnje površinskih voda.

“U oba slučaja problem su bile površinske vode, plavljenja i prskanja okolnih objekata. Postavljenjem rešetki, te polaganjem cijevi na Moščanici riješili smo problem površinskih voda

na ovim lokacijama,” pojasnili su u Odsjeku za komunalne poslove Općine. Projekat je, s oko 4.500 KM, finansirala Općina Stari Grad, a izvođač radova je bila firma “HISE A&A” d.o.o iz Sarajeva.



Rešetka u ulici Hamdije Kreševljakovića



Firma "Mibral" iz Sarajeva krajem aprila počinje prvu fazu rekonstrukcije ulice Strošići na Vratniku, najavljeno je iz Službe za investicije, komunalne i inspekcijske poslove Općine. U ovoj ulici živi više od 300 stanovnika, u nešto više od 150 domaćinstava. "Koliko su zahtjevni radovi govori i to da u sklopu projekta imamo

sanaciju kadrme, jednog dijela asfalta i stepeništa," pojašnjavaju u Službi. Dodaju da su sa KJKP Sarajevogas postigli dogovor da radovi počnu čim se završi grijna sezona. Radovi će se izvoditi u dvije faze. Prva faza radova podrazumijevat će rekonstrukciju centralnog dijela, a u drugoj je predviđena rekonstrukcija pet krakova ulice.

Vrijednost prve faze 380.000 KM

U obje faze radit će se kompletna izmjena infrastrukture, postavljanje novih vodovodnih i kanalizacionih cijevi, te kišnih i fekalnih odvoda. Predviđeno je postavljanje oko 800 metara kanalizacionih i vodovodnih cijevi, preko 180 individualnih priključaka, te postavljanje preko 1.000 metara kvadratnih kaldrme. Finansijeri ovog velikog projekta su Ministarstvo prostornog uređenja Kantona Sarajevo i Općina Stari Grad Sarajevo. Vrijednost prve faze radova je oko 380.000 KM. Rok za za završetak je 38 kalendarskih dana.

Zamijenjene polomljene ploče u Ferhadiji

Izvršena je sanacija polomljenih ploča u Ferhadiji (od Apoteke Sarajevo do Slatkog čošeta) i susjednim ulicama Jelića i S.H. Muvekita. Ploče u ovom dijelu ulice Ferhadija postavljene su krajem '90-ih godina, a godišnje se tekućim održavanjem vrši zamjena ploča koje popucaju tokom zime. „Na mjestima gdje su popucale granitne ploče postavljene su nove, a tamo

gdje su ploče ostale cijele, a nisu u svom ležištu, fiksirane su. Riječ je o redovnom održavanju Ferhadije i sporednih ulica koje Općina Stari Grad provodi svake godine“, istakli su u Odjeku za investicije Općine. Zamjenu polomljenih ploča sa oko 5.200 KM finansirala je Općina Stari Grad, a izvođač radova je bila firma „Balkan kamen“ iz Sarajeva.




Za sanaciju izdvojeno 5.200 KM



Sanirane polomljene kocke

Sanirana kocka na Širokači



Početak aprila obnovljene kocke

Početak aprila urađena je sanacija granitnih kamenih kocki u ulici Za Beglukom, na Širokači. Na cijeloj dionici urađena je sanacija kocke, a radovi su podrazumijevali ručni iskop postojeće ulegnute granitne kocke, te novu ugradnju u sloju pijeska sa fugovanjem spojnicama. "Sanacija je izvedena na cijeloj dionici, a izvođač radova je bila firma KJKP "Rad"". Vrijednost radova iznosila je oko 30.400 KM.

Sanirana oštećenja na 31 lokaciji



Ulica Safvet-bega Bašagića

Urađena je djelimična sanacija kolovoznih oštećenja i krpljenje udarnih rupa „hladnim asfaltom“ na području općine Stari Grad. Za ove namjene iz budžeta Općine je izdvojeno oko 6.000 KM. Kolovozna oštećenja i udarne rupe sanirane su na 31 lokaciji, a projektom su bile obuhvaćene sve starogradske mjesne zajednice.

„Radovi su počeli sredinom marta, a odvijali su se po planiranoj dinamici. Sanacija je urađena tzv. „hladnim asfaltom“, jer je u ovom periodu sanacija jedino moguća na taj način zbog niskih temperatura“, pojasnili su u Službi.

Počela proljetna sezona BH Telecom lige



Prva na listi ekipa OŠ "M. M. Bašeskija"

Proljetna sezona BH Telecom fudbalske lige osnovnih škola Starog Grada počela je 26. februara, a posljednje kolo bit će odigrano 30. aprila, 2015. godine.

Nakon odigranih 15. kola, prva na listi sa osvojenih 35 bodova je selekcija OŠ "Mula Mustafa Bašeskija", druga je "Edhem Mulabdić" sa 32 boda, treća "Šejh Muhamed ef. Hadžijamaković" (28 bodova), te "Vrhbosna" (23 boda), "Hamdija Kreševljaković" (10 bodova) i "Saburina" (3 boda).

Najbolji strijelci nakon 15. kola BH Telecom fudbalske lige su Muhamed Šabić sa 29, Aldin Pojata sa 22, te Alden Titorić i Tarik Alić sa po 12 postignutih golova. Sve utakmice igraju se na terenima Centra za mali nogomet "Bentbaša".

Jesenja polusezona BH Telecom fudbalske lige osnovnih škola Starog Grada trajala je od 01. oktobra do 03. decembra, 2014. godine, a prvak je bila selekcija Osnovne škole "Edhem Mulabdić".

Škola plivanja za starogradske osnovce



Školu pohađa 211 učenika

Na Olimpijskom bazenu Otoka počela je besplatna škola plivanja za starogradske osnovce. Ove godine školu plivanja pohađa 211 učenika četvrtih razreda svih šest starogradskih osnovnih škola. "Škola plivanja za prvu grupu polaznika počela je 06. aprila, i trajat će deset radnih dana, odnosno do 17. aprila. U ovoj grupi su 102 osnovca iz škola "Mula Mustafa Bašeskija" i "Edhem Mulabdić", pojasnili su u Službi za obrazovanje, kulturu, sport i lokalni razvoj Općine. Obuka za drugu grupu osnovaca, njih 109 iz škola "Vrhbosna", "Šejh Muhamed ef. Hadžijamaković", "Hamdija Kreševljaković" i "Saburina" bit će organizovana od 20. aprila do 01. maja, ove godine.

Saradnja

Sektor za tehničke poslove pomaže Općini Cazin



Služba unutrašnje zaštite i zajedničkih poslova Općine Cazin radit će po uzoru na Sektor za tehničke poslove i obezbjeđenje Općine Stari Grad Sarajevo. U ovoj općini Unsko-sanskog kantona, koja broji oko 70.000 stanovnika, u planu je sistematizacija službi koje djeluju unutar organa Uprave, a vođeni idejom da rad službi definišu po već provjerenim aktima, obratili su se Općini Stari Grad. Potraživši potrebne informacije na općinskoj web stranici, došli su u kontakt sa rukovodiocima Sektora za tehničke poslove i obezbjeđenje, koji su im izašli u susret i uputili im potrebnu dokumentaciju kojom su definisane obaveze i zadaci Sektora. Prema riječima Saida Samardžića, savjetnika načelnika Općine Cazin, vrlo brzo su dogovorili sastanak i uslijedila je njegova posjeta Starom Gradu. "Općina Cazin osniva unutrašnju službu zaštite, unutar organa Uprave. Sticajem okolnosti, ono što mi planiramo da napravimo podudarilo sa vašim sistemom. Vidjeli smo da ste dobro organizirani i imate sistem koji je ispred našeg, te smo odlučili zatražiti savjet," pojašnjava Samardžić.

Kontrola nadzora i pristupa prostorijama

Govoreći o onome što će se promijeniti u njihovom radu, Samardžić ističe da Općina Cazin nema usklađen Pravilnik o sistematizaciji radnih mjesta sa Zakonom o unutrašnjim službama zaštite

i zaštitarskih agencija, tako da još uvijek nisu angažovali potrebne zaštitare. Naglašava da se uvjerio i u izuzetno dobru kontrolu pristupa pojedinim prostorijama, što će i sam predložiti menadžmetu Općine Cazin. Uvjerivši se da sistem vatrodjave postoji u svim općinskim kancelarijama, Samardžić je kazao da će i to pokušati uskladiti. "Posebno me dojmilo što u Velikoj sali, gdje se održavaju sjednice Općinskog vijeća, imate mogućnost snimanja i direktnog prenosa putem web stranice," kazao je Samardžić.

Prijem novih zaštitara u Czinu

Mi još uvijek radimo po starom sistemu i imamo portire, a to su uglavnom RVI, u poodmakloj životnoj dobi. Raspisali smo konkurs za prijem zaštitara i on je u krajnjoj fazi odabira uposlenika sa odgovarajućim certifikatom, kao što su kod vas. U Sektoru za tehničke poslove sam se uvjerio i da imate jako dobru kontrolu nadzora, kazao je Samardžić.



Bodonyi, Teodorescu, Pšenica, Hennessey i Pezzuta posadili stabla

Ambasadori Francuske, Rumunije, Slovačke, Ureda Vijeća Evrope i vatikanske Svete Stolice u BiH u protekla tri mjeseca sadili su sadnice u Aleji ambasadora. Ekselencije Claire Bodonyi, Filip Teodorescu, Jan Pšenica, Mary Ann Hennessey i Luigi Pezzuta, s načelnikom Općine Stari Grad Ibrahimom Hadžibajrićem i predsjedavajućim Općinskog vijeća Vedranom Dodikom, zasadili su 137, 138, 139, 140. i 141. stablo lipe u Aleji ambasadora.



Hadžibajrić i Dodik sa Bodonyi

dora. Sretni zbog pružene prilike da zasade lipu, ambasadori su se zahvalili načelniku Hadžibajriću.

“Lipa je simbol života, a u BiH izgleda da je i simbol prijateljstva. Iz sveg srca mi je drago što sam danas zasadila drvo da uvijekovječim prijateljstvo između Francuske i BiH,” kazala je Bodonyi.

Ambasador Teodorescu kazao je da za ljude sa Balkana sadnja drveća ima posebno značenje.



Pšenica i Hennessey

“Želim da ovo bude znak podrške moje zemlje Bosni i Hercegovini kao samostalnoj, nezavisnoj i suverenoj zemlji i njenom putu ka Evropskoj uniji”, istakao je Teodorescu. Hennessey je kazala da se nada će ovo drvo biti znak nade i snage za sve nekonstitutivne narode, osobe koje se još zovu povratnicima, jake ali potcijenjene žene, osobe sa drugačijim sposobnostima, nezaposlene i sve one koji poput grana ovog drveta moraju da se bore za svoje mjesto pod suncem.



Dodik i Teodorescu

Pšenica je istakao kako je inicijativa da postoji nešto poput Aleje ambasadora izuzetno lijepa i da ona čini grad još ljepšim i promovise ga u inozemstvu, te da se nada da će u Aleji biti još dosta prostora za nove sadnice.

Apostolski nuncij u BiH, ambasador vatikanske Svete Stolice kazao je da je drvo koje je posadio, drvo mira koje nas treba podsjećati da svi trebamo čuvati, utvrđivati i izgrađivati mir.



Hadžibajrić i Dodik sa Pezzutom

Više od 110.000 pregleda web stranice

Prema podacima servisa Google Analytics, web stranica Općine Stari Grad Sarajevo (www.starigrad.ba), zabilježila je do aprila ove godine 33.993 posjete i više od 110.000 pregleda. Broj posjeta u januaru iznosio je 10.344 (32.805 pregleda), u februaru 11.388 (37.764 pregleda), a u martu 12.261 (39.689 pregleda). Važno je naglasiti da je u istom periodu

Google Analytics registrovao skoro 50% novih korisnika, odnosno posjetilaca web stranice, u odnosu na ranije registrovane. U pregledu analize sa kog govornog područja su zabilježene posjete, primjetno je da je najviše korisnika posjetilo općinsku web stranicu sa prostora SAD-a, čak 48%, a potom slijede Hrvatska, BiH, Velika Britanija, Srbija i Njemačka.

Donacija i pokloni za rođendan Harisa Tvrtkovića



"Željini" dres najdraži poklon

Haris Tvrtković, dječak koji je 2011. godine preživio tešku saobraćajnu nesreću kada ga je vozilo JU Zavoda za hitnu medicinsku pomoć Kantona Sarajevo udarilo na raskršnici u Vogošći, 06. marta je proslavio 18. rođendan. Uz novčanu donaciju, poklone i slatkiše, Haris se ipak najviše obradovao dresu i rekvizitima NK "Željezničar". Ibrahim Hadžibajrić, načelnik Općine Stari Grad i Vedran Dodik, predsjedavajući Općinskog vijeća Stari Grad, uručili su Harisu donaciju za nastavak liječenja, te prigodne poklone. U akciji prikupljanja sredstava za nastavak liječenja učestvovali su uposlenici Općine Stari Grad i učenici osnovne škole "Edhem Mulabdić" koju je ovaj dječak pohadao prije nesreće. Zajedno sa predstavnicima Općine, Harisu je u posjetu išao i Hadis Zubanović, igrač NK "Željezničar", kojem se on, kao vatretni navijač Željezničara, posebno obradovao.

Nakon udara vozilom Hitne pomoći, Haris se pet i po mjeseci borio za život u Kliničkom centru u Sarajevu, a tri mjeseca je bio u induciranoj komi. Dvije teške operacije, kontrakture stopala izvedene su mu u Hrvatskoj jer u BiH to nije bilo moguće. Njegova stopala danas su spašena, svakodnevno vježba sa fizioterapeutom, počeo je koristiti kompjuter, pričati, smijati se... Za nastavak liječenja, odnosno tretman botoksom, potrebna su značajna sredstva, a Zubanović je obećao da će se zajedno sa bh reprezentativcem Edinom Vščom zauzeti da ta sredstva budu obezbjeđena.

Harisa Tvrtkovića posjetila je i njegova bivša razrednica iz OŠ "Edhem Mulabdić" Dina Baković sa kojom se prisjetio školskih prijatelja, ocjena i drugih dogodovština iz vremena prije nesreće



Haris sa nastavnicom Baković

Predstavljamo uspješne male privrednike iz Starog Grada

Jubilej: 120 godina Mušine tucane kahve


Nezaobilazno mjesto posjete svih gostiju Sarajeva, a među njima i brojnih visokih državnika, političara, privrednika, glumaca, sportista ● Svakodnevno se prži i tuca, a nerijetko i konzumira kahva

Samostalna obrtnička radnja "RM" u kojoj se prži i tuca kahva na Baščaršiji, ove godine obilježava 120 godina otkako je dedo Mušo otvorio najstariju sarajevsku kafanu na Vratniku 1895. godine, pa do danas kada njegovi nasljednici uspješno održavaju tradiciju kroz proizvodnju tucane kahve.

Hajrudin Burek sa svojim sinovima na Baščaršiji i nakon 120 godina održava tradiciju Mušine tucane kahve. Najstariju sarajevsku kafanu na Vratniku, koju je rahmetli Muharem Bekrić Mušo otvorio 1895. godine, uspješno su pretvorili u samostalnu obrtničku radnju koja se nalazi u blizini Gazi Husrev-begove džamije. U radnji, koja uspješno djeluje već 17 godina i koja je postala nezaobilazno mjesto posjete svih gostiju Sarajeva, a među njima i brojnih visokih državnika, političara, privrednika, glumaca, sportista, svakodnevno se prži i tuca, a nerijetko i konzumira kahva.

Kako se nekad plaćala kirija u Čaršiji

Bureka smo, u njegovoj mirisom svježih pripremljenih kafe 'okupanoj' radnji, posjetili zbog priznanice koju je poklonio Službi za privredu Općine Stari Grad, a koja datira iz 1923. godine. Dokument na komadu stare, požutjele hartije dokaz je da se prije 92 godine tačno znao poredak stvari, te da se kirija ured-



Najstariju sarajevsku kafanu otvorio Mušo 1895.



Hajrudin čuva brojne uspomene na Mušinu kafanu

no izmirivala svakog mjeseca. Novac se predavao 'na ruke' muteveliji vakufa Fadilpaše Šerifovića, a za tadašnji objekat na Vratniku je iznosio 300 dinara. "Neki dan sam prelažući neke papire naišao na čak dvije priznanice o plaćanju kirije iz 1923. godine. Jednu priznanicu sam poklonio Službi za privredu Općine, a drugu smo zadržali zajedno sa ostalim uspomnama na rahmetli Mušu", objašnjava Burek.

Kameni dibek star 150 godina




Kahva se tuca u kamenom dibeku

Burek kaže da se najprije gleda kvalitet sirove kafe, koja se mora pažljivo probati, pa se prži u šišu i nakon toga mora da odstoji 24 sata, da se ohladi i da iz nje ispari sva vlaga. Nakon toga, kahva se tuca u kamenom dibeku koji je star više od 150 godina, kao i čuskija što je uspomena od dede Muše iz "turskog vakta". Tada se kafa mora prosijati i ono što prođe kroz sito ide na pakovanje, a ono što ostane u situ ide natrag u dibek da se dalje tuca. Kako kaže, za jedan kilogram kahve potrebno mu je 15 do 16 minuta da je istuca u dibeku.

Priznanica iz 1923. godine

Priznanica iz 1923. godine, koja je sačuvana među nekolicinom starina koje baštini porodica Burek, vlasnici radnje za proizvodnju tucane kahve na Baščaršiji, pokazuje kako je naše društvo bilo uređeno prije 90 godina, te na koji način se odvijala naplata zakupnina za objekte u tadašnjoj Čaršiji.



Staro Sarajevo

Projekat "Gornji Halvadžiluk", povratak halvadžijske čaršije

Sarajevo imalo 45 čaršija

Kroz vijekove u Sarajevu su se razvijali zanati koji su se grupisali u esnafa, a tako su onda počele da nastaju i čaršije srodnih esnafa. Zabilježeno je da je u Sarajevu u minulim vijekovima registrovan 81 zanat, a kasnije su bili grupisani u 45 čaršija koje su se nizale jedna po jedna. Osmanlije su sve čaršije nizali u jezgri starog dijela grada, a pružale su se zapadno kroz Sarajevo. Jedna od tih čaršija bila je i HALVADŽIJSKA. Centralna tačka današnje Čaršije je Sebilj. Istočno od Sebilja prije više stotina godina formirala se halvadžijska čaršija koja je okupljala halvadžije (poslastičare) koji su pravili halvu od meda i pekmeza. Pojavom šećera na ovim prostorima (u 19. stoljeću) ovaj esnaf je doživio preporod, povećao se asortiman i roba koja je stizala, tako da se halvadžije smatraju pretečom sarajevskog poslastičarstva jer upravo to je bila baza za njegov razvoj.

Prvobitna halvadžijska čaršija bila je tijesna, pa se počela širiti prema sagrdžijskoj čaršiji koja je bila smještena na lokaciji gdje se danas nalazi taxi štand (prema Bakijskoj džamiji).

"Halvadžijska čaršija je prilično oštećena u velikom požaru 1842. godine. A, njen centralni dio na platon Baščaršije potpuno je uništen 1908. godine. Ostali su samo dijelovi halvadžijske čaršije koja se proširila u sagrdžijsku (današnji taxi štand), a i ona je uništena poslije Drugog svjetskog rata, kada su tadašnje vlasti odlučile da sruše sve što je staro. Tada na njenom mjestu nastaje trg za taksi i autobusko stajalište," priča izuzetni poznavalac historije Sarajeva Mufid Garibija, koji je ujedno i tvorac idejnog projekta gradnje novog "Halvadžiluka".


Halvadžijska čaršija mogla bi opet biti izgrađena

Na mjestu gdje se nekada nalazila, od Musluk česme prema Bakijs-

koj džamiji, halvadžijska čaršija mogla bi opet biti izgrađena. Idejni projekat, arhitekta Garibija, predviđa gradnju trinaest novih dućana, nanizanih jednolinijski, koji neće imati tavansku, nego krovnu konstrukciju i svi će biti veličine od oko 10-ak m². Između njih će biti četiri prolaza koji će ih spajati sa ulicom Sagrdžije i taksi štandom koji, za potrebe njihove gradnje neće biti uklonjen, dok bi autobusko stajalište eventualno bilo izmješteno na drugu lokaciju. "Dućani će se uklopiti u arhitekturu Baščaršije. Sama kompozicija će biti bosanska arhitektura sa ćepencima, nešto kamena i bjeline, s tim da

će portali biti i sa jedne i sa druge strane. Gradit će se u kaskadama, a fasada će biti u tri boje. Ulaz će biti sa strane gdje je sada kombi stajalište," pojašnjava Garibija.

Projekat "Gornji Halvadžiluk" bi u sljedećoj fazi trebao dobiti izvedbeni projekat kojim bi se definisala njegova ukupna vrijednost i razmotrile mogućnosti njegove realizacije. Nakon toga bi se pristupilo prikupljanju potrebne dokumentacije, između ostalog i potrebnih dozvola od strane Komisije za zaštitu nacionalnih spomenika i Federalnog zavoda za zaštitu spomenika kulture, s obzirom da se Baščaršija nalazi na listi nacionalnih spomenika.





Sebilj svaka Sebil "yol" antaama gelen Arapça bir kelime olup, ancak dinnim arabil22iya tava kavabo ve susuz heriml baskoon bu kerpce çok eski bir sadaka kurumu, meydanlara çeyno çeklin taonlar.

Alexander Vitek tarafından, 1754 yılında İstanbul'da kuruldu. 1852 yılında İstanbul'da kaldırıldı.

Šećerni Sebilj

Poslastičar Damir Rožajac napravio je prvi šećerni Sebilj, tortu visuku 75 cm i tešku oko 30 kg, a njegov rad je na prestižnom takmičenju u Istanbulu nagrađen bronzanom medaljom.

“U Turskoj sam želio predstaviti Sebilj, pokazati svijetu da on postoji i da je autentičan. Pokušao sam pokazati kako i mi pratimo trendove, a u isto vrijeme njegujemo našu tradiciju” kazao je Damir.

